



REPUBLIKA E SHQIPËRISË
Kuvendi

PROJEKT LIGJ

Nr. _____/2026

PËR

DISA SHTESA DHE NDRYSHIME NË LIGJIN NR.10018,
DATË 13.11.2008, “PËR AVOKATURËN E SHTETIT”,
TË NDRYSHUAR

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

Në ligjin nr.10018, datë 13.11.2008, “Për Avokaturën e Shtetit”, të ndryshuar, bëhen këto shtesa dhe ndryshime:

Neni 1

Në nenin 4 bëhen këto ndryshime:

1. Në shkronjën “b” të pikës 3 hiqen fjalët “ose zyrat e Avokaturës së Shtetit”.
2. Pika 4 ndryshohet si më poshtë vijon:

“4. Avokatura e Shtetit ka në përbërjen e saj ndihmësit ligjorë të avokatëve të shtetit dhe administratën mbështetëse. Marrëdhëniet juridike të punës së ndihmësve ligjorë të avokatëve të shtetit rregullohen sipas dispozitave të këtij ligji dhe të Kodit të Punës. Marrëdhëniet e punës së punonjësve të administratës mbështetëse rregullohen sipas legjislacionit në fuqi për marrëdhëniet e punës.”.

Neni 2

Në nenin 5, bëhen këto ndryshime:

1. Shkronja “c”, e pikës 1, ndryshohet, si më poshtë vijon:

“c) përfaqëson dhe mbron interesat pasurorë të organeve të vetëqeverisjes vendore përpara gjykatave të të gjitha niveleve, pa autorizim të posaçëm të të përfaqësuarit, në çështjet gjyqësore në të cilat këto organe janë palë. Në çështje të veçanta, sipas kriterëve lëndore dhe sasiore, të përcaktuara në rregulloren e miratuar nga Këshilli i Ministrave, Avokati i Përgjithshëm i Shtetit mund t’ia delegojë të drejtën e përfaqësimit dhe të mbrojtjes organit të interesuar të vetëqeverisjes vendore;”.

2. Në pikën 2, bëhen këto ndryshime:

- a) Në shkronjën “b”, hiqet togfjalëshi “ ... për ato raste kur asistenca juridike ofrohet në përputhje me shkronjën “c” të pikës 1 të këtij neni”;
- b) Në shkronjën “c”, hiqet togfjalëshi “ ... pavarësisht nga marrëveshja e lidhur sipas shkronjës “c” të pikës 1 të këtij neni.”.

Neni 3

Pika 4, e nenit 9 ndryshohet si më poshtë vijon:

“4. Pranë misionit të përhershëm të Republikës së Shqipërisë në Këshillin e Evropës, Avokati i Përgjithshëm i Shtetit, cakton një ose disa avokatë shteti, si përfaqësues të përhershëm dhe që veprojnë në emër të tij, pranë Gjykatës Evropiane për të Drejtat e Njeriut.”.

Neni 4

Në nenin 12 bëhen këto ndryshime:

1. Titulli i nenit 12 ndryshohet dhe bëhet “Avokatët e Shtetit pranë ministrive”;
2. Në pikën 1, togfjalëshi “krijohen zyra me” zëvendësohet me “veprojnë”;
3. Në pikën 3 hiqet togfjalëshi “ose zyrat e Avokaturës së Shtetit”.

Neni 5

Pas nenit 12 shtohet neni 12/1 me këtë përmbajtje:

“Neni 12/1

Ndihmësi ligjor i Avokatëve të Shtetit

1. Ndihmësit ligjorë të avokatëve të shtetit emërohen nga Avokati i Përgjithshëm i Shtetit, në nivel qendror dhe vendor, sipas strukturës dhe organikës së Avokaturës së Shtetit të miratuar me urdhër të Kryeministrit, në përputhje me procedurën e miratuar me urdhër të Avokatit të Përgjithshëm të Shtetit.
2. Ndihmës ligjor i avokatit të shtetit emërohet personi që plotëson kriteret e mëposhtme:
 - a) është shtetas shqiptar;
 - b) ka përfunduar ciklin e dytë të studimeve në drejtësi në tre vitet e fundit, me mesatare të ponderuar 9.00 - 10.00;
 - c) ka jo më pak se 1 (një) vit përvojë pune në fushën juridike;
 - ç) nuk është dënuar me vendim gjykate të formës së prerë, për kryerjen e një veprë penale;
 - d) ka zotësi të plotë për të vepruar.
3. Ndihmësi ligjor i avokatit të shtetit punon pranë një ose disa avokatëve të shtetit, në nivelin në të cilin është caktuar sipas pikës 1 të këtij neni.
4. Ndihmësi ligjor i avokatit të shtetit analizon praktikën gjyqësore përkatëse mbi interpretimin e dispozitave të zbatueshme për çështjet në gjykim, përpunon çështjen dhe përgatit mbrojtje të thjeshta standarde me shkallë kompleksiteti të ulët për përfaqësimin dhe mbrojtjen nga avokati i shtetit, kryen detyra të tjera për hetimin administrativ dhe përpunimin e çështjes siç kërkohet nga avokati i shtetit. Rregulla specifike, të drejtat dhe detyrat e ndihmësit ligjor të avokatit të shtetit përcaktohen me urdhër të Avokatit të Përgjithshëm të Shtetit.”.

Neni 6

Në nenin 20 bëhen këto shtesa dhe ndryshime:

1. Në shkronjën “c” të pikës 1, pas togfjalëshit “Shkollës së Magjistraturës” shtohet teksti me këtë përmbajtje:

“ ... ose plotëson një nga kriteret e mëposhtme:

- i) zotëron përvojë pune mbi 7 vjet si ndihmës ligjor i avokatit të shtetit në Avokaturën e Shtetit;
- ii) zotëron përvojë pune mbi 10 vjet si avokat, profesor, lektor i së drejtës, ose ka ushtruar mbi 10 vjet profesionin e juristit në strukturat juridike, në një nga institucionet qendrore të administratës shtetërore.”.

2. Pas pikës 1, shtohen pikat 1/1 dhe 1/2 me këtë përmbajtje:

“1/1. Emërimi i avokatëve të shtetit sipas nënndarjeve “i” dhe “ii” të shkronjës “c”, të pikës 1, të këtij neni, nuk mund të jetë më shumë se 50 përqind e vendeve vakante të përvitshme, numri total i të cilave përcaktohet çdo datë 31 të muajit janar nga Avokati i Përgjithshëm i Shtetit.

“1/2. Përfundimisht, nëse gjatë të njëjtit vit kalendarik nuk plotësohen vendet vakante të mbetura, nëpërmjet provimit të pranimit në Programin e Formimit Fillestar të Shkollës së Magjistraturës, këto vende vakante plotësohen sipas përcaktimeve në nënndarjeve “i” dhe “ii” të shkronjës “c”, të pikës 1, të këtij neni.”.

Neni 7

Në nenin 27, pas pikës 4 të tij shtohet pika 4/1 me këtë përmbajtje:

“4/1. Paga e ndihmësit ligjor të avokatit të shtetit është sa 0,45 e pagës së Avokatit të Përgjithshëm të Shtetit.”.

Neni 8

Hyrja në fuqi

Ky ligj hyn në fuqi 15 ditë pas botimit në “Fletoren zyrtare”.

K R Y E T A R I

NIKO PELESHI